

研

棧

齋

文

集

研機齋文集卷一

惠州 趙希璜 渭川

重修長寧學宮記

乾隆三十七年春詔開四庫全書館文物聲明之化燦然
大成海隅徼塞四方萬里莫不振興文教涵濡
聖澤擦觚之士趨輦轂下者近數千人我

朝

聖聖相承尊師親儒培養學校百有餘年禮讓興行風俗
醇美嗚呼盛矣今年歸安胡君以東莞丞來攝寧陽寧故
僻壤環山而城地磽而瘠士夫冠蓋寥寥焉胡君因慨
然於先務之急也親民之本也變易之方也鼓勵之術也

遂殷然而有修學之舉於是周覽堂廡以及門垣其中體製未合缺者補之廢者修之復旁叅形勢家言相厥陰陽擇其剛燥明倫堂舊在學宮之左崇聖祠舊在聖殿之後今改崇聖爲明倫而另立崇聖祠五楹於後又立尊經閣於崇聖祠後魁閣舊位於壬今移建於艮文閣舊位於戌今移建於坤泮池舊窄而汙今開廣二尺櫺星門舊隘而低今增高二尺復立照牆於前復立訓導署於左復於文閣前立文昌門復於魁閣前立青雲門殿廡之剝蝕者黝堊丹雘之垣墉之傾圯者約門楹橐之蓋自公首輸五十金爲倡寧之人士率私錢以助者二千一百有零用之力一萬二千二百有零良材堅斲之用合耗銀一千二百

有零董其事者邑貢生潘君廷泰陳君亮陳君開鼎捐職
經歷潘君鴻錫廩生陳君開第附生賴君有健潘君應麟
武生陳君國揚周君大武邱君振煌監生羅君世桓李君
朝林李君培林詹君聖慧凡九閱月而告竣嗚呼何其規
模之闊燿也何其經營之周密也何其落成之速也何其
就此不勞也夫

聖天子振興文教道德一風俗同康熙十八年

詔天下修整學宮乾隆二年復

詔天下有司所在學宮有頽廢未修及其禮文禮器之未
備者許各詳達動項興修寧亦應

詔重修而卑陋褊迫不足爲萬世師表之美觀邑之人欲

修而大之而聽於吏吏又聽於邑之人凡數十載於茲矣
胡公獨有見於先王之道德出於性命之理而性命之理
出於人心遂使縣人樂聞公言趨蹌奔走其事者合千萬
人無異詞是非今

上尊師親儒培養學校之明驗也哉功竣之後闔邑請記
於希璜希璜寧產也且始終其事故記之乾隆四十七年
十一月初十日也

重修西安府城記

代

今

天子御極之四十年春巡幸江浙閱視海塘時撫臣畢公
恭迎

鸞輅瞻覲

天顏

垂詢陝服情形首以修理城垣事宜條對

聖意俞之越明年秋

欽差工部侍郎德公馳赴甘肅佑修蘭州府城公卽陳奏
及時興作並奏請德公於蘭州工竣路出西安便宜指畫
蒙

旨允准隨奉

上諭陝西爲三秦扼要漢唐建都之地其城垣形勢本極崇閎壯麗但歷年久遠未經修整其一切築建基址務從其舊不可收小以致規模狹隘卽費數十萬帑金亦不爲過公聞

命之下卽與德公悉心勘驗凡城身共長四千二百七十一丈八尺北城長四百一十五丈二尺毋庸修整其餘應改造者計長三千八百五十六丈六尺高三丈六尺五寸城上正樓四所凡二十八間箭樓四所凡四十四間礮樓四所凡十二間角樓四所凡四間廳樓九十八所凡二百九十四間所有門闕睥睨石承平礮諸式商運木植砌石

甌壁土灰繩鐵等事無不詳加周畫豫定章程隨飭發厯
年州縣報解商筏稅銀及司庫存留備用銀百餘萬兩以
供支應考西安府城在漢爲石內史理所漢書地理志京
兆尹長安縣高帝五年置惠帝元年初城六年成惠帝本
紀元年正月城長安三年春發長安六百里內男女十四
萬六千人城長安三十日罷鄭德曰城一面故速罷又六
月發諸侯王列侯徒隸二萬人城長安五年正月復發長
安六百里內男女十四萬五千人城長安三十日罷九月
長安城成史記惠帝三年方築長安城四年就半五年六
年城就大事記元年始作長安城西北方三年初作長安
城五年成史記與漢書紀載日月或不合司馬禎據宮闕

疏曰四年築東面五年築北面傳以鄭德云云則漢書之說爲正焉三輔黃圖初置長安城狹小至惠帝更築之高三丈五尺上濶九尺下濶一丈五尺周廻六十五里城南爲南斗形北爲北斗形今稱爲北斗城者是括地志元和郡縣志並云故城在今長安縣西北十三里蓋隋時自漢城東南遷都龍首原故舊址在唐城西北今人呼之曰楊家城隋書文帝本紀開皇二年六月詔左僕射高頴等創造新都十二月名曰大興城地里志開皇三年置雍州城東西十八里一百十五步南北十五里一百七十五步西京記大興城南直子午谷在漢城東南十三里地里通釋云南侵終南子午北據渭水東臨漣灞西枕龍首原呂氏

以爲子午谷乃漢城所直隋城南直石鼃谷則已微西不正與子午對則就宋永興軍城言之以證隋書故事實非矣宋敏求長安志叙唐京城坊巷興善寺在靖善坊慈恩寺在晉昌坊崇聖寺在崇德坊莊嚴寺在永陽坊元都觀在崇業坊樂遊廟在昇平坊皆在城內今興善寺去城南五里慈恩寺去城南十里崇聖寺去城西五里莊嚴寺去城南十二里樂遊廟更在慈恩之南元都觀則在興善之西並遠居城外李好文長安志圖云新城唐天祐二年匡國軍節度使韓建所築時朱全忠遷昭帝於洛毀長安宮室百司及民廬舍長安遂墟因去宮城又去外郭城重修子城是爲新城卽今奉元路府治然則今城於唐末爲新

城於宋爲永興軍城於元爲奉元路城實盛唐子城遺址
城自唐末迄今有修築無改建明洪武中都督濮英設廳
樓九十八所環堵崇墉之制始肅其四門東曰長樂西曰
安定南曰永寧北曰安遠嗣是正統嘉靖隆慶年間復稍
稍補綴之我

朝順治十三年康熙元年暨乾隆三年二十八年相繼葺
治歷時既久土氣浮薄甄木剝蝕關中形勝西北屏藩貢
使往來商賈輻輳不興巨役莫肅觀瞻畢公因大工伊始
奏請布政使司臣圖公薩布按察使司臣秦公承恩鹽法
道臣顧公長綬課程稽覈其分督四城西城北城則令蓋
屋縣令徐君大文長安縣令高君燦興平縣令王君垂紀

朝邑縣令莊君忻主之東城南城則令華州牧汪君以誠
咸寧縣令郭君履恒永壽縣令許君光基郿縣令李君帶
雙主之春秋左氏傳稱士彌牟城成周計丈尺揣高卑度
厚薄仞溝洫物土方議遠邇量事期計徒庸慮材用審餼
糧公皆有之以故總事四年役徙日萬條分縷析雜而不
遽經始於乾隆四十八年六月十八日竣工於五十一年
九月二十二日動用

帑銀經工部奏請者計一百五十八萬五千一百五十八
兩有奇凡厯督臣三人今嘉勇公大學士福公今兵部尙
書慶公前昭信伯大學士李公撫臣三人曰畢公何公永
公布政使司臣二人曰圖公薩布泰公承恩按察使司臣

二人曰秦公王公昶督糧道臣三人曰姚公頤蘇公楞泰
顧公長紱鹽法道臣三人曰顧公吳公之黼舒公弼西安
府臣二人曰和君明徐君大文徐君以盤屋令擢潼關司
馬先後一再攝事焉公身處梁苑而心縈大工偶有所見
必致書籌擘蓋用心深歷事久經營周密故規模闕耀若
此五十一年十月十一日欽奉

上諭永保奏陝西西安城垣於九月內一律完竣請派大
臣帶領諳熟工程之員來陝驗收等語西安省會城垣於
乾隆四十六年降旨令前撫臣畢沅動項興修並派德成
前往勘估籌辦現在工程完竣着派侍郎德成馳驛西安
將該城工履勘查收是否如式堅固之處據實具奏仰見

我

皇上慎重疆圉捍衛民生之至意由是垣墉陴堞百雉重
新古稱百二河山洵推西陲巨鎮誠久遠之宏規非示一
時之偉麗而已臣承乏分陝適遇告成睹此盛業例得記
之其在國語曰衆志成城道德經曰防意如城城之時義
大矣哉宜

聖天子之深謀遠慮超邁漢唐也

重修彰德府學宮記 代

學宮記多矣茲曷記乎記其始也記學宮之始多矣又曷記乎記其經始之難而落成之速也彰德府學創建郡西北隅者始於北宋至和年間守斯土者爲郡人韓琦元至元六年監郡荀凱霖總管杜德遠先後踵修郡人許有壬記之詳矣明洪武正統景泰成化宏治嘉靖隆慶萬厯天啟崇禎年間俱重加修葺守斯土者正統時爲知府趙恭景泰時爲知府王銳成化時爲知府王瑤宏治時爲知府馮忠隆慶時爲知府陳應麟而郡人郭朴所記者則應麟所修也

國朝順治十五年知府宋可發重修康熙三十三年知府

湯傳楷重修康熙五十三年知府繆發重修乾隆五十二年知府盧崧重修而惟繆公發記其始末焉步雲啣

天子命於五十五年來守是邦下車之始首謁學宮瞻仰殿廡周覽門垣慨然於

崇聖祠之規模狹隘也學東垣之日就傾圯也爰進學博士郭琮馬華國而諮詢之郡弟子員某某而勗勵之鳩工庀材某某俾司其事修弊舉墜某某俾總其成凡六閱月而告竣蓋自步雲首輸七白金爲倡郡人士率私錢以助者若干用人之力若干良材堅甃之用若干合耗銀若干嗚呼經始何若是之難而落成若是之速也爰爲斯記以詔後之守斯土者

重修彰德府大堂壁記

所謂堂者臨民以聽治也堂而以黃名者太守臨民聽治之堂也韓琦以畫錦名其堂者琦爲郡人仕宦而至將相富貴而歸故鄉此歐陽子作記之意也希蹟則謂其詞大而夸非魏公忠君愛民之意也夫以琦之功業所謂社稷臣也其忠於君也於撤簾諸事見其持重焉其愛斯民也於鑿渠諸事見其經濟焉此郡伯孫公以忠愛命斯堂之意也考府舊治在今治之東百餘武爲北宋韓重贇所建後琦三治相州益作堂亭園池雄於河北明初改趙王高燧府今治則始於洪熙元年在舊治之西規制俱極淺隘正德十六年知府陳策因重拓焉府誌所載如是顧歷年

卽久甄木剝蝕不加修葺莫肅觀瞻郡伯抵任之五年政和歲稔雨暘時若從黎庶請重修斯堂物仍其舊以昭儉也制取其宏以壯觀也功竣之日爰命希璜誌其始末勒諸貞珉希璜登斯堂也願體郡伯之忠愛以自勗闔屬之登斯堂也願各體郡伯之忠愛以共勗焉時乾隆五十有九年某月日安陽縣知縣趙希璜記

嘉慶安陽縣志序

曰嘉慶安陽縣志者何也仿元和郡縣志而作也是志始纂於康熙三十一年安陽縣知縣馬君國楨再纂於乾隆三年安陽縣知縣陳君錫輅閱今又六十年矣希璜於乾隆五十七年壬子由夏邑調任安陽次年癸丑延太倉王明經開漢次年甲寅延興縣康舍人儀鈞同纂斯志尙未成書而希璜調署濟源藁經散失去年戊午偃師老友虛谷武君億過從與之商榷考據爲圖爲表爲志爲傳爲記體例凡五而另編爲錄博取金石以資考證夫圖之爲言度也度地之廣輪而圖之也爾雅釋詁謀也說文計畫難也周禮地官大司徒以天下土地之圖周知九州之地域廣

輪之數夏官職方氏掌天下之圖以掌天下之地註云圖若今司空郡國輿地圖也表之爲言標也標其年次名位以爲表也說文表上衣也書畢命表厥宅里晉書置茅菴設望表註謂立木以爲表表其位也志之爲言準也以準志將來也說文从心之聲志者心之所之也書盤庚若射之有志疏云如射之有所準志志之所主欲得中也前漢書有十志師古曰志記也積記其事也傳之爲言傳也以傳示後人也說文驛遞曰傳集韻曰訓也賢人之書曰傳紀載事迹以傳於世也記之爲言紀也類紀衆事也說文疏也徐曰謂一一分別記之也禮王制大史典禮執簡記註國有禮事則豫執簡記載所當行之禮儀文心雕龍後

漢始有公府奏記記之言志進已志也錄之爲言總也總錄衆事也說文借鈔寫字也公羊傳春秋錄內而畧外禮檀弓愛之斯錄之矣前漢書于定國傳萬方之事大錄於君註云大錄總錄也圖以度地故圖爲首表以紀年故次之志以準事故又次之傳以書人故又次之記以類紀故又次之錄以總錄故又次而另編之畧表志傳記凡十三卷錄凡十二卷其考据經史旁求金石虛谷之力居多至於綱舉目張條分縷析希璜蓋七閱寒暑而後成此書矣

鯨背橋修禊叙

伐

相在河朔爲大郡洹水於相爲巨川士大夫來遊是邦者
莫不托蹟登臨寄情觴詠况牧於此者乎乾隆五十八年
歲在癸丑莫春余率賓從僚屬禊飲安陽之鯨背橋賦詩
校射羽觴隨流履舄交錯以視右軍蘭亭之會有不謀而
自合者是可述而識矣此地西望太行東瞻淇澳所謂崇
山峻嶺茂林修竹則同前引萬金之渠後瞰五龍之窟所
謂清流激湍映帶左右則同於時春鳥弄晴雲木如洗所
謂天朗氣清惠風和暢則又同至於彼無絲竹管絃此有
蓬弧正鵠雖若靜躁微分然遊目騁懷其致一也蓋自晉
迄今凡厯一千四百四十一年閱二十四甲子而適逢是

歲歲逢此月於以續往古幽情成良辰嘉會豈非所謂欣
於所遇暫得於已者哉雖然右軍臨文嗟悼感慨係之而
余獨幸好雨知時良苗被野又幸相民樂其歲物之將登
而喜睹余遊也然則余之快然自得且有十百千萬於古
人者韓魏公安正堂九日讌集詩云留與鄴都爲故事年
年常占好風光是尤余景行之微志也夫時同遊者安陽
知縣長寧趙希璜臨漳知縣鬱林陳甲海涉縣知縣咸寧
張丕緒林縣知縣太湖王申伯彰德都司龍巖陳國瑚守
脩天津潘大經彰德教授邴縣郭琮訓導滎陽馬華國安
陽教諭夏邑彭魯得訓導汲縣秦聯登無錫丁雲銘仁和
周書同武進李世模山陰金尙炎長寧趙惺新興李廷桂

安陽諸生馬兆吉姚春華張儒朱超羣朱殿元王耀先喬
鵬飛爲斯記者彰德知府富平孫步雲也

戚鶴泉集杜詩序

余齊年生戚鶴泉大令集杜詩若干卷出以眎余余非知詩者曷能言詩又曷能序鶴泉之詩然竊謂詩之爲教溫柔敦厚自有葩經則漢魏以降皆糟粕也自有唐律則宋元以降皆糟粕也自有少陵集詩人之大成者也自有集杜棄少陵之糟粕取少陵之精液者也夫組織精工衣冠優孟以文害辭以辭害意而詩不可說矣鶴泉曰余非知詩者以古人之詩爲詩耳以古人之詩爲詩非寢食於古人浸淫於聲律曷能運少陵之句爲鶴泉之詩如聚米如畫沙如雪痕如鴻爪一片化工所謂天下幾人學杜甫誰得其皮與其骨讀鶴泉詩可以開拓心胸推倒豪傑不必

餽飮爲奇艱澀爲古矣或曰詩以窮而後工余有鶴泉之窮而無鶴泉詩之工行將竊比於鶴泉寢食少陵浸淫聲律亦以古人之詩爲詩耳

和陶詩序

楊田村進士之湖南潁行書和陶詩囑作序田村曾任四川安岳令江西大庾人

誰饒古澹前有蘇州繼得津梁定歸玉局新主白蓮之社
人在梅闕重開黃菊之籬地非彭澤湖西江之派和貧士
之詩看奮筆以千言嗤折腰於五斗品地則爭傳伯起門
風則上接盈川早稱黃雀之投環共稔楊梅之對客廼者
人人繕寫侈北里之臙脂字字流傳誇南朝之金粉田邨
於焉力追正始出入三唐偶和淵明低徊五柳異楊朱之
失路同王粲之離家言情則花下尊前托興則樓頭扇底
宋風謝雪總遜清華何粉荀香徒形豔麗對春山之蘊藉
偏宜收入牛腰宛秋水之平夷何必盡歸畫裏藉他銷夏
都忘車馬之喧如可留畊已遂園田之樂況夫浣花溪上

人矣行吟折柳橋邊悠然覓句愛訪楊雄之宅曾登嚴武
之牀天半浮雲晴開玉壘城南石室化洽文翁幾回書破
瀟箋一片春生錦里今也京華旅食羨君鼓吹休明嶽麓
南遊使僕夢魂顛倒勞勞送客不啻歸去來辭渺渺懷人
願續桃花源記從此鸞山鳳嶺待染雲烟金水銀坑重霏
珠玉婉美人於屈宋采香草於瀟湘

甜雪詩餘序

爲楊田邨進士作

樂府流傳原在金元曲子南唐風味全憑組織工夫豔體偏多宮詞不少抄來北里錄向東家誰翻十院琵琶莫說一軍簞策無腰不瘦人誇家令門風有謫皆仙我羨隴西才地則有大庾詩人睡梅詞客橋霜店月嚼雪而甘鞭影櫓聲拈花而笑寒香沁骨不必亭有松風小令成聲何事市多雕本援微詞而通志倚麗句以留情是雖江上餘波雲中寸爪已現蛟螭之狀無非龍鳳之形粉艷鉛昏紙淪墨敝有謂而竟成逋客無聊而別署漫郎檀板銀箏酒旂詞扇豈見訶於禪客非自托於伶官獨成一家釐爲五卷半織元稹之曲都吟柳永之章僕每怪夫時人詞則指爲

小道倘非傑作疇雪斯言慷慨悲譎昔傳燕市風流文采
今屬先生

漳神廟碑

粵自洪濛旣判人神道殊五嶽四瀆備載祀典出雲降雨
變化之極引出萬物不可形詰民無能名陰陽莫測若夫
生而聖智沒爲明神事屬邈茫理獨庸近靈瑩內聚精爽
外朗護

國功赫濟衆利溥漳有河伯於今爲烈昔祠西史遠駕秦
漢二千餘載如幾如式廼汜水孫公以英挺之姿當知命
之年具孝友之望貢圭璋之選正文體之僞砥狂瀾之柱
掇賢書之雋擢禮經之首仰東山則思霖雨言鉅手則接
昌黎公諱棧喬汜水北周村人戊子以禮記魁於鄉顧偕計南宮莫獲看花於上
苑空羣北國未能展足於金臺管輅自遜治民樂巴咸稱

嚳水蓋神奇早擅於生前斯禋祀共昭於身後爰以示夢
鄉人棄屣圯橋車悲折轂河咽披沙良朋永嘆僕夫告瘁
五夜戒衰適遭龍睡恍兮惚兮冠帶假室是耶非耶鳳鸞
受鏃投異汨羅淚鮮瓊瑰銅臺高揭而魂依漳水東流而
魄降馨香俎豆遂隆血食而配西史聰明正直不以眞象
而作閻羅庚子公年五十三歲公車北上漏五下過漳橋適橋折車陷投於輿中先是磁州之講武城土人王思玉夢冠帶而至者曰吾河神也將假室於爾王驚寤罔知所謂而公之同行友張凌霄李丕山來購櫬器王因述厥夢共相駭嘆比者上柳口決幾同瓠子河開汎濫百里而近

安臨二縣毘連渰沒田廬慘傷心目度土功而堵禦登赤
子於衽席因先期警於衆復詰旦祝諸廟曰維璜與海未
能恤民維安與臨未能事神神愛斯民億倍於人人奉吾

神疾痛呼親果默應以如響循故道以順行旣清濁以滙
歸拯黎庶以乂寧不終朝而功集聽萬喙而歡騰豈人力
之推挽實神貺之和平樹貞珉於廟側誌隱德於碑陰癸丑
七月上柳口決水勢漫溢希璜偕臨漳知縣陳陰陽原無
君甲海率衆禱於神不崇朝而水歸故道焉

二致神人共契一心知今之視夫昔猶昔之視夫今

跋王耘渠先生樹滋堂遺文稿

予友武進黃仲則詩學李昌谷睥睨一世落拓不羈中年
偃蹇以沒今其詩散失其嗣子聞隨人宦遊邊徼去而吳
會英才集中所選者僅百餘首又予同年生順德張葯房
詩文俱有成就亦盛年周謝嗣子幼冲其遺稿未知存否
近聞覃溪師將序兩人詩文而刻之又未知能得兩人全
集與否金壇王耘渠先生橐中集墻東續稿贈炙天下人
口者已數十年茲先生曾孫林縣尉士琦持先生樹滋堂
遺文眎予曰是先生課孫草也予受而讀之因歎良工不
肯示人以樸而王君能世守先人之手澤於勿替也予不
知仲則葯房之子弟能如王君否而廿載深交竟不能取

兩人遺藁公之同好壽之梨棗俯仰今昔負我良友者多
矣至於先生之文當代奉爲楷模斯固無庸予之論次也
已

募修興善寺轉輪藏經閣序

蓋聞三界轉輪大千說法園名歡喜沼對醍醐夫轉四諦法輪而證道果經云轉輪聖王卽是如來又云佛昔於波羅奈斯轉法輪今乃復轉無上最大法輪者城南五里許大興善寺卽晉武時之遵善寺也隋開皇間詔僧徒二十餘萬實之招提之盛甲於海內故易今名唐元和四年建轉輪藏經閣維時僧素公手植青桐數株每至夏桐汗污人衣如輶脂不可浣昭國鄭相嘗與丞郎數人避暑惡其汗謂素曰弟子爲和尚伐此樹各植一松也及暮素戲視樹曰我種汝二十餘年汝以汗爲人所惡來歲有汗我必薪之自是樹不復汗素公在院內轉法華經三萬七千部

夜嘗有狼子聽經齋時烏鵲就案取食僧元幽詩曰三萬
華經三十春半生不謁院門塵爲素公作也太和二年得
梵像觀音作大士閣並移大內天王閣於寺唐末惟二閣
巍然獨存由宋迄明興廢不一而轉輪藏經閣歲久傾圯
非復靖善舊觀因思感希有之瑞立非常之廟天地神祇
咸加靈被自如來遷迹忽逾千載塔寺之興以表遺化茲
則蛤像無存杜楊雜編唐文宗以蛤像菩薩賜興善寺寶珠自在滿以金布惟
有祇陀所望十方檀越證人天之果發慈悲之心光明不
異於祇樹孤園功德並煥於慈恩薦福大宏佛教永駐祥
輪使青鴛感覺路之開斯禪燈續雞園之舊矣

黃翠山先生小傳

先生姓黃氏諱軒翠山其自號也先世居程鄉後居長寧有隱君子諱金鳳者先生之曾大父也值明季多艱營弁捕流寇弗得日戮良民邀功公挺身赴軍門爭辯之所全活數千人人謂黃氏有隱德久矣先生幼而失怙流離顛沛遂轉徙爲連平州人性嗜讀書研磨經史寒暑弗輟方其講學梅溪也遠近則之遊於門者皆獲實學以去里之婦孺曉大義識禮教先生啟之也鄉人擬諸周茂叔司馬君實之爲人自弱冠補弟子員旋食餼屢躋名場竟以明經終老而先生恬然先是先生困於家計風塵蒼莽中岸然自立獨往獨來有謂爲貧賤驕人者先生聞之輟然語

諸子曰某貧則貧矣賤則未也且德之積也不厚則其任大福也必天閼興之暴難爲繼矣旣而嗣君叔顯成進士授編修歷清要官以

覃恩晉先生封爲奉政大夫仲子叔揚附貢生次叔傳以選拔中式順天副榜諸孫之登賢書者二人餘皆知名於時先生年八十餘復舉一子精神矍鑠不殊少壯其沒也值孫開雲捷音至含笑以終得年八十有六人咸以爲隱德之報云

修職佐郎鶴山訓導葉始堂先生家傳

連平有通經學古之儒曰葉始堂先生諱應乾字元一其先博羅人始祖政徙居長吉二圖之東溪實前明宏治時也長吉十圖故爲河源地後析置長寧遂屬寧旋建連平又析長吉之二圖屬焉自曰升公以下始爲連平州人而居東溪者始大先生之大父秀士公爲郡庠生早卒大母唐以節著父諱萬華亦不克享上壽先生幼孤事母唐孺人孝謹甚至家故貧舌耕爲業又弗忍遠離以傷母心故延先生者皆近村居人歲時伏臘甘旨必親嘗而後進母病侍湯藥衣不解帶者經月母亡後幾以毀滅性予家去東溪纔十五里先生館穀於予家者幾十年故與先生之

分最切而悉先生之事特詳先生長身古貌目炯炯有光清癯似鶴音雌肩背聳如負重物少嗜帖括穿穴經史間爲小詩亦中聲律補博士弟子旋食餼講學鄉塾從遊者往往取制科以去而先生終不遇性素直諒與人爭事刺刺不休必得其理而後止予嘗方之米海嶽及其恬退功名不矜不躁則汪汪千頃陂人也晚年得眩暈疾幾不起有葉開美者恍惚入冥間見司命主者謂開美與先生俱不獲免旁有人曰葉某孝謹直諒算可延旣而先生之疾果愈越十二年先生以明經任鶴山訓導受事兩閱月卒於官舍得年七十有二子二人芹珍藻珍藻珍前卒論曰書不云孝乎惟孝友于兄弟士之通經學古而本實

先撥者觀先生可以風矣抑怪誕之事儒者弗道若葉闕
美言其說近怪而世人每樂爲稱道之然耶否耶

前湖北巡撫寶臣周公傳

公名琬字寶臣性伉爽尙氣節廉介自持祖父傑榆林鎮總兵官父道新刑部侍郎加禮部尙書

國史有傳公弱冠充大興縣廩生以正一品任子授刑部山西司主事洊陞至郎中時有皮趙者業皮而富先爲旗人伍什圖家奴因訟值理宛轉請托公拒不納將嚴繩之次日堂參司寇海壽以語侵公公不讓而移病會事達上聽有海壽着跪着辦事之

諭事載張照文集復有番役某挾嫌誣公受賂經步軍統領敖善叅奏而都御史孫嘉淦奉

命鞠審番役以誣告充軍敖善罰俸公草職事載羅暹春

石村文集卷一
西曹舊話乾隆五年

詔修大清律例公以廢員充纂修官事竣司寇張照歷陳
公可用狀蒙

召見復以刑部主事用歷員外郎授寧武知府調平陽知
府陞四川川北道雲南按察使調四川按察使旋陞四川
布政使擢貴州巡撫調福建巡撫以母憂回籍乾隆二十
四年奉

上諭湖北巡撫一時不得其人周琬守制已逾一載着暫
往署理欽此公赴都陞見蒙

諭旨速赴新任庚辰湖廣總督蘇昌奏公玩視民瘼辦事
與督臣掣肘奉

旨交調任總督愛必達查奏會臬司沈作朋揭報歸州牧趙泰交誣良爲盜愛欲並泰宜昌守公以率轉罪輕請俟審明後續泰與愛議論不合愛遂以爲掣肘証覆奏奉旨草職發往巴里坤効力贖罪旋以捐修直隸城工免赴新疆而歸州案遂以誣良成讞未幾歸州牧秦鏞撫實原案情節仍以盜具愛慚於檢舉爲刑部糾叅奉嚴旨拏問愛與公俱問重辟隨蒙

特恩釋放發往伊犁續奉

密旨撤回授刑部江西司郎中卒於位公沒後三十餘年貧不能葬亦可哀也已子二繩祖安陽庠生兆鰲已亥科安陽縣舉人孫四書已酉拔貢戊午舉人原武縣教諭方

公之奉

密旨也

欽差按公直抵配所先命從人搜檢書籍有無怨望悖逆
字樣徐探懷出

上諭宣讀有歸州一案原與周琬無干之

諭公受

上深知也如此迄今西曹言廉介者猶嘖嘖稱公不詭隨
於衆云

閨秀吳惠姬小傳

吳惠姬名申歛之西溪人予友武林詩人錢君袖海之原配也父爲涵齋編修母鮑孺人夢鶴翔於庭而生惠姬故勿名鶴仙太史自喪偶後盡室徙長洲女素慧課以經史過目無遺忘間爲詩詩復工聲律與諸弟默射傳註事爲戲每十不失一太史嘗曰吾家有女顏回可竝曹大家時袖海方才名藉甚故歸袖海惠姬事舅姑孝接妯娌和神情朗散清心玉映室有雙梧閣與袖海倡和其中復創立鴛鴦社一唸一詠致足佳者亟編之以互評工拙閣擅林泉之勝更闌月上臨風鼓琴裊裊不忍睡飄飄便有出塵想謂袖海曰君視妾是鶴可得附佐卿令威拉西子湖梅

精作王母宮司書女否又曰妾是夢中人非畫中人君視
春山定如秋月否性嗜花陰與袖海刻砌上輒視花陰所
至移座其下拾枯松枝煎茗對酌品漢魏詩袖海每爲
所屈因袖海善繪事從學勾染不數日遂工見者謂其得
仲姬遺意至其下筆嫵媚轉過袖海惠姬之適袖海也甲
午之春越丙申而袖海北上越戊戌而惠姬下世得年二
十有八先是袖海臨行惠姬戲謂袖海曰君去作元稹妾
當勝道蘊袖海徐吟曰謝家最小偏憐汝惜卿亦嫁黔婁
耳別前一夕鐙下爲惠姬作白描小像卽今之雙梧圖也
迨袖海歸而總帳空懸閣中人杳家人語袖海曰孃子歿
時手封奩具曰待郎歸啟之袖海啟奩中得玉魚一枚雙

梧閣小草一卷鴛鴦社吟箋一卷墨蘭水仙二幅袖海大
勵誓不復娶旣爲悼亡百韵詩及主魚記傳奇以寓意甲
辰春夢惠姬翩翩控鶴而至言笑甚歡檢篋中則雙魚躍
躍謂袖海曰以是爲贈覺後袖海復作紀夢圖以誌其異
今年余來京師寓宣南法源古寺與袖海寓邸相去咫尺
袖海以傳爲請爲掇其畧書之

渭川子曰予曩居京師聞閨秀吳鶴仙名時未識袖海也
去年與袖海訂交於揚州讀其悼亡詩及王魚記王武子
所云未知情生於文文生於情者今觀雙梧紀夢二圖則
惠姬端莊靜整富貴福澤之象顧不獲於其生此其必得
騷名於身後也然無玉魚生世豈知有鶴仙哉

祭南礪李先生文

夫何造物之忌名兮美人不憚其殃羗上壽其伊誰兮彼
彭鏗之先殤望雲門之山兮固千古而爲芳也悲先生之
遇兮亦好修以爲常也溯昭陽單闕之辰兮網南海之明
珠以憂戚玉弓於成兮花落而驚魚感深知於一日兮情
九死而不渝乃微言之我撼兮余行行其趑趄先生豈不
諒余之中忱兮抑余名以進余也槿朝苑而夕萎兮曾不
保其初也撫松柏之本性兮非聊以自娛也而後乃今而
知惴惴之無華兮名不貴其有餘也知先生之人兮東原
書昌先生知之人兮魚山葯房予或先而或後兮予名之
未揚冀修能於遲暮兮擷蘭桂以登堂周戴之望洋兮或

肩及於馮張何瘡膚之昏昏兮媚嫉以惡之陟衡岳以褻
衷兮身熒獨以奚依適蒼梧之野兮長跪而瞰詞子厚其
有言兮非人所居明神沒爲柳兮羌彼愚溪予廁不屑之
教兮奚敢干言而上書乃先生之長逝兮知我者其誰歟
予鬱邑而獨居兮浪浪予涕之垂予偃僂而却步兮氣結
莫申其悲已矣哉先生之名成兮捐塵壒而棄余望璧月
與珠星兮懸蕙帳而相俱想人生之落落兮亦浮雲之過
太虛

公祭同年黃遜來文

嗚呼天何生才之難而摧殘之易耶君於丁酉選拔貢入
成均與某某爲同歲生戊戌來京

廷試交遊半天下名士旋以

朝考不與選入四庫館爲謄錄官非君志也已亥茲逢

聖天子七旬萬壽

詔開恩科君應京兆試顧不獲雋而中副車與鄉人某某
又爲同歲生交遊益廣而天下之名士皆重君爲正人去
年秋四庫全書告竣例得議叙君不肯就外階乞改學博
吁君之志爲何如耶君蓋深知天之生才之難欲得名山
大川讀書數十年有所成就然後出而問世以爲一代醇

儒君志若此嗚呼孰知君之成就遂止於此耶今年六月
君方謀南歸遽以羸疾卒於旅耶嗚呼哀哉蠟鳳髻齡繡
虎弱年座無叔度世無顏子長史云徂南城不祿悠悠蒼
天生才若是之難而摧殘竟若是之易耶因哭君曰鸞兮
受箴桐兮遭爨鬼憎陸機客嘲王粲皓月不圓彩霞易散
蝶化蒙莊鵬迷蜀棧友道在人曰砭曰鍼詩賡伐木易繫
斷金惠施微言伯牙賞音蘭摧玉碎冥冥沉沉庾銘酸辛
潘誅悽惻浪浪涕垂蹇蹇冤塞芳草藪幽浮雲風默驥不
可程鵬不可翼氣薄蒼穹芒寒珠斗彭鏗先殤伊誰上壽
一慟脫驂長思我友暫駐靈旗來歆絮酒

公祭姚雪門臬使文

嗚呼珠斗光寒蒼穹氣薄虎位雲頽鶉分星落金刀掩鉞
文江絕涸神理難追儀型如昨仰維淵範久著金船虞封
裕後火紀徵先高琳神石楊寶靈鱸何期玉白便上瑤天
秀甲西南家雄許史百尺知桐一鳴稱驥佩到

鳳池紳垂

螭陛簪筆雍容言動注記金蓮官燭琅笈秘書叨陪香案
校理石渠

右文所啟前席相於茂先議鼓昌黎辨車五際臯牢三雍
揮綽經術斯深衡文攸托校士南湘輶軒文鐸習聽春蠶
工求秋鶴頑豔靡均清濁鮮符乾坤盤礴氣數昭蘇惠匠

所琢剔而益舒巧心所濬酌而不虛

帝嘉龔黃入稱召杜河東股肱首推季布清繼掛魚奇徵
渡虎監司旋陟坐鎮關中黃圖穆穆綠野芄芃元凱轉運
耀卿遺風繡衣旣錫丹旻是崇臬事時陳八條按俗績姬
治安名高嶽麓分路揚鑣式彰素著

帝簡良弼西顧蘭山濂溪理學勝之崇班戴盆有燭輪也
同攀再直

內廷重瞻教胄桃李無言春風依舊縟以龍梭文刪雞門
輔弼銅樓王商猶後鐵網之設志在珊瑚璣鏡之照意別
瑾瑜士風丕振文教同敷奚以桐爨竟痛鸞笄夜凜四知
日維三省匪以矜張絕此干請咏菊韓琦賦梅宋璟亮節

剛腸庶幾堪並千齡應錫百福方適何圖怛化遽爾仙遊
雞年未逼駒隙難留僚案隕涕間巷停謳酌酒悲深執綏
誼在捧袂奚時題襟不再旒返西秦神歸東岱敬弔溪蘋
式陳哀誄

公祭黃母蘇太夫人文

華井蓮凋湘江竹殞緱嶺笙悽羸樓簫泯瀨姊騰悲夸娥
牽紉誅有安仁悼同元稹維我宮保名在旂常上公早襲
崇德是皇世傳鴻案

國貢龍章同牢尹姑佐饋姬姜維我夫人眉山舊族軾輶
外家邢譚眷屬少慕溫恭早輕綺縠才薄迴文車能挽鹿
彩鸞旋嫁鳴雁相呼歸我宮保袍茜帕珠二姚姻婭四姓
規模貴能思儉安不忘劬宮保昔年馳驅烟瘴粵嶠屏籬
廈門保障雅歌投壺羊祜名將燕婉琴尊夫人克相威名
洋溢峻業昭宣瑤珂相望畫戟凌烟勛高裴令銘勒燕然
七閩梓里冠蓋蟬聯海國珠洋渦旋雪吼伏波矍鑠樓船

疾走手豢蛟龍口銜星斗夫人在家躬操箕箒桃榔葉黑
荔子枝鮮饒謨返旆花鳥歸船

溫綸特沛夫人與焉象服翟衣犀翹爵鈿長信宮中日華
門左面藥口脂釵梁翠朶

賜出彤樓捧歸青鎖

曠典奇逢

殊恩遠播翩翩冢嗣坐鎮中州後昆濟美各擅才猷謝王
竇桂虎劣龍優箕裘衍慶堂構貽謀截髮剝薦丸熊畫荻
郵書封鮒授經夜績賢稱擇隣情怕捧檄以方夫人罕覩
史冊夫人八座命婦頭行榮封一品綵舞諸郎祥徵玉燕
瑞共蘭香前人阿跌當代汾陽迺逢月缺遽散霞靄坤範

空存母儀不再蕙帳消紅松門掩黛敬
毫芳蓀公陳哀誄

文林郎直隸唐縣知縣紫峯謝君墓誌銘

代蔡小霞同年作

歲癸卯謝君紫峯以勞瘁卒於官其子文榮爲余門下士
余旣深知紫峯惜其官不竟所志越今年丙午文榮歸里
壆親持狀來乞爲志謂余熟紫峯事甚詳欲得余文以昭
來世雖然余曷能志紫峯按狀君姓謝氏諱廷詔字興士
號紫峯惠州博羅人系出陳郡陽夏爲過江僑姓居會稽
趙宋時有官循州者曰某遂家博羅前明時官橫州學正
者曰守鑾爲君十三世祖考璠以儒修醇謹爲族黨式妣
某孺人君有兄曰廷濬曰廷斌曰廷燦君少穎敏過目無
遺忘讀書輒數行下始興訓導陳君兆燾見而異之因字
以女年十八入學隨食餼乾隆庚辰舉於鄉丙戌下第選

一等以知縣分發直隸明年假海豐大使越四年知無極縣未幾丁內艱歸服闋回直隸候補乙未假盧龍丙申移判深州戊戌改知唐縣時制軍周公元理雅重君委鞠馬蘭哈達獄凡八案讞上卽報可縣西南岱洋社村庄數十瀕唐河君相其地宜稻依南方治水田式令民濶河棲畝兼築閘以備旱潦自是歲得穀數十萬石四十五年霍雨害稼遍於鄰邑而唐獨豐收縣民某爲李甲毒斃鄰人矢其妻與有私君廉得其情寃始雪閔四月其妻襁遺腹子詣庭謝更生有二生某某素無賴人目爲二虎君詳黜之且戍其尤惡者君素強幹遇事敢爲會得喘疾多不寐猶力疾視事剖決曲當以故唐縣無寃民而君竟以勞瘁卒

於位易簀時附身之外無長物子弟走哀數月始得附櫬
南歸邑人痛君之沒也啜泣之聲震原野君在直十餘載
興利除害若嗜欲至前後承共

行宮輦路桎牾幄帟之事二十餘次蒙

恩賞給荷包緞疋五次加級七次初君之開稻田也意仿
古督亢陂事余聞之謂北方治溝洫可善田如南方若盡
得南方人肯盡心爲吏以南田之法治北方田益多稻益
富可以省漕設吏爲民此經理之大者使君得永年其治
行當爲天下第一矣君生於雍正丁未五月初十日子時
卒於乾隆癸卯二月二十日卯時年五十有七子三文榮
乾隆己亥科舉人議叙八品京官改銓教諭娶麥氏文佐

監生娶陳氏文衡監生娶蘇氏孫六逢階逢恩志歡順歡
嵩壽永壽女二長嫁監生黃培運次嫁縣附生韓杏孫女
二塋於是年某月日銘曰

羅浮有樹大蔽牛其蔭如蓋其枝樛雞辰謝傳歸松楸銘
諸元石貞千秋

黃海門居士墓誌銘

海門居士予之友也其仲兄致如予之甥也予先藉交於其長兄廻江繼交致如二君皆恬雅蘊藉恂恂如不能言最後識海門海門氣宇岸然友于甚篤而天性好潔不樂與俗人交二兄皆嚴憚之予之畏友也海門於奇文奧義一覽了然手抄子史楷法精妙學書自鍾王外不屑道也尤重廉隅雖纖介不苟取常面斥人過稱人善惡機鋒而喜清談當世交重其爲人幼病疹失調得嘔血症每謂廻江曰予算至乙未必死生雖無益於世死必證無上菩提蓋海門精星學而邃內典也先是屏棄科舉業謂拾人牙後語故詩古文詞俱有成就益都李進士文藻來令恩平

延爲記室李今之聞人也生平不多推許而爲其所引重者率皆一時知名之士歲辛卯致如與於鄉始翻然曰予獨不可一試乎於是操觚帖括者甚力明年應本省鄉試扶病入闈榜出被落別予先歸其抑鬱之狀相視慘然旣而長吁謂予曰予太歲在未必死今疾不可爲矣子歸也其盍省予比予歸而海門之病霍然猶冀其言之不售也而海門已預卜塋所經營死後事予甚怪之次春予館穀於增城廻江以書寄予曰海門於子去後已長逝矣臨終諄諄囑置麻繖於棺海門蓋不欲傷父母心而意實以此志孝也海門連平州人姓黃氏諱昇雲得年三十娶賴氏無子妾生一女而夭茲將於某月日塋於某所廻江謂予

曰海門與子居同方年相若子知之最詳子宜爲銘以慰
其存亡者銘曰

大道無私斯文不沒吁嗟乎此爲海門之室

待贈文林郎孝隱宋府君墓誌

墓有志志其隱也志其隱德不欲表諸世也鄭州宋孝隱先生余之父行而陝西試用知縣元兆之尊人也余與宋大令定交在丁未之春大令攝華州牧余卸延川事僑寓青門朝夕過從悉先生事綦詳辛亥二月余赴京師別大令聞先生病甚遂以三月十一日卒於興平官廨其明年壬子大令自鄭州持狀來乞志先生謂余文質而不華可昭先生隱德於來世耳按狀先生姓宋氏諱克用字公臣曰孝隱先生者鄉人推奉之稱也自先生以上俱以儒隱曾祖附生懷珮公妣毛孺人祖附生允中公妣崔孺人考子遠公妣李孺人子遠公捐館時先生甫八歲哀毀骨立

儼如成人稍長事李太孺人以色養油油藹藹門內無間
言年十五娶邵孺人善相夫子益得太孺人歡戚黨遠近
知先生之孝而莫能名先生之孝也性爽慨磊落尤友愛
諸弟與人處恂恂如不能言至獎掖後進敦睦鄉黨則汝
南月且睦乎後矣子二元兆元璧當元兆之筮仕於陝也
先生不肯同行留侍太孺人敬謹彌篤承色笑職溫清者
又二年而太孺人卒先生以毀滅性積勞成疾幾不欲生
元兆時攝華州迎養至署先生體素壯至是已皤然一翁
矣逮元兆攝寶雞西鄉興平諸縣先生隨元兆任每逢霜
露之晨輒淒然泣下凡五年而先生卒嗚呼若先生者可
以風世矣先生生於雍正三年八月十六日丑時卒於乾

隆五十六年三月十一日寅時享年六十有七子元兆丁酉授貢中癸卯舉人陝西試用知縣原配徐氏繼娶王氏元璧增廣生娶朱氏孫三廷奎州學附生廷翼廷珍曾孫玉鎮以乾隆五十八年三月廿七日酉時葬於祖塋左側壬山丙向之原其令子元兆之友安陽縣知縣長寧趙希璜謹誌

已酉進士修職郎華亭縣儒學教諭桐軒荆府君墓誌銘

乾隆甲寅九月十九日桐軒進士荆公卒於華亭縣儒學官舍其明年乙卯訃於豫其老友長寧趙希璜官安陽縣知縣以事至大梁晤其仲弟玉樵爲桐軒之位哭於城南相國寺閱八月玉樵持桐軒狀來乞爲誌按狀公姓荆氏諱汝翼字廷偉號桐軒一號澹齋系出荆王賈之後故世居丹陽縣之丁橋鎮爲江南望族曾祖諱行昌邑庠生妣陸氏祖諱無敵邑廩生妣陸氏父諱雲龍以公仕贈修職郎華亭縣儒學教諭妣蔣氏

贈孺人公年十八補博士弟子員旋食餼庚寅中式第九

名副榜時陳臬江蘇者爲光山胡雲坡尙書耳公名延教其子樸齋吏部甲午秋尙書內擢行與公俱至都後賃宣南法源古寺督課樸齋甚嚴余以丙申入成均亦賃寺屋以居昕夕相對寒暑兩易時同寓習制科業者爲余鄉人欽州馮魚山比部暨其弟季求明經公亦偕其弟玉樵州倅時余年三十有一桐軒長余七歲余以兄事桐軒而友愛玉樵如弟丁酉應京兆試俱不獲雋報罷南歸余送公至丁橋鎮登堂拜母公亦省余於蘇州府城之寓邸公於次年入都補鑲白旗教習官癸卯復應京兆試中式第九十六名舉人教習期滿引

見以教職用己酉會試中式第三十六名

朝考入選

殿試第二甲第十九名

賜進士出身庚戌選授華亭縣教諭越五年甲寅九月十九日巳時以疾卒於官舍距生於乾隆四年己未八月初三日未時得年五十有六德配莊氏生丈夫子二人長鳴謙庠生娶傅氏次交泰廩生先卒娶張氏女子二人長適庠生某次適庠生某孫男一人名華胥爲鳴謙出公長於制義如孤蓬自振驚沙欲飛其徒如洪君亮吉胡君鈺焦君興皆獲高第以去公獨偃蹇場屋垂三十年始得一第又不能竟其所學作博士冷官天復不假之以年遂其欲竟之志以爲後進楷模余與公交最深情最篤而一官落

落潦倒風塵遇與公同公先賁志以沒嗚呼隻雞絮酒感慨平生余之痛心當何如也茲以某年月日祔塋於金壇縣野廟堂村先塋丁山癸向之原希璜因誌其墓而銘之
曰

佳城鬱葱兮鵲翩飛浮雲縹緲兮魂安歸得所歸兮遂所
依先塋之側兮藏清輝

勅封文林郎廣東保昌縣知縣黼堂姚府君墓誌

丙辰冬姚曉園大令以憂歸道出鄴下余與曉園訂交在
巳亥之秋時曉園以母太孺人憂僑寓羊城余鄉人黃君
輝雲雅重曉園且稔爲興縣康茂園先生門下士亟爲余
言余亦受業於康先生之門者也於是昕夕過從兩月有
餘嗣曉園歸里塋親及赴粵補官忽忽十有八載而余宦
遊秦豫亦復十年去冬見面都不相識矣曉園瀕行再拜
囑余曰明年三月將塋吾親子文樸無諛詞盍爲志之余
固辭不獲今春正月使人持書與狀來按狀府君姓姚氏
諱撫辰字永清號黼堂爲雲巖府君之長子系出安徽桐
城始祖有名通者明初以軍功顯封伯爵歷鎮宣大雁門

僑居於代是爲府君十七世祖府君幼豐碩以力聞性伉
爽坦白無城府喜功名務馳騁與仲弟體辰遊庠後獨以
壯武冠其曹欲有所樹立於是出入燕趙晉冀間與其豪
傑遊尙氣節輕施與旣不自得則與時上下稍稍爲居積
蓄聚以治生家以日裕嘗謂人曰人知取之爲取而不知
與之爲取管子高山牧民之術不過是也中歲食指以千
百計繁費日滋府君以身任之不甚顧惜嗣疊遭大父母
喪塋益不事生產家且中落因慨然曰吾諸子皆長能自
立所有貲蓄穀糧悉與弟姪族人難之有太息泣下者已
亥春秉哲以舉人議叙知縣分發粵東旋以母氏趙太孺
人之喪歸塋服除奉府君至粵侍膝下承歡笑者七載丁

未秋決意歸晉嗚呼詎意遂成永訣也府君生於康熙五十年辛卯五月初二日子時卒於嘉慶元年丙辰三月十一日辰時得年八十二歲配趙孺人先府君十八年卒有丈夫子五人長秉忠先卒次秉哲乙酉舉人廣東保昌縣知縣次秉仁秉奎皆先卒次秉鈞女子一孫九人曾孫八人茲以嘉慶二年三月某日附塋於祖塋巽山乾向之原囑其友安陽縣知縣長寧趙希璜志其墓嗚呼希璜曷能文又曷能志公墓耶因讀馬文淵傳援辭况欲就邊郡田牧况曰汝大才當晚成良工不示人以樸且從所好後文淵轉遊隴漢間嘗謂賓客曰丈夫爲志窮當益堅老當益壯因處田牧至有牛馬羊數千頭穀數萬斛旣而嘆曰凡

殖貨財產貴其能施賑也否則守錢虜耳乃盡散以班昆
弟嗚呼若公之善居積析貲財及與之爲取之言不與馬
文淵後先炳耀也哉希璜志而不銘從曉園之請無爲諛
詞存其實也謹志

皇清勅授儒林郎湖南州同借補常德府經歷先兄叔明
趙公墓誌銘

嘉慶二年十一月二十五日余兄叔明卒於官兄諱希濬
字叔明號哲溪先府君之第三子生母王安人兄與余同
爲丙寅生兄以五月十六日丑時長余兩月余生母戴恭
人先王安人卒余與兄相依若命而見者每悞認爲孿生
兄以貢生充四庫全書館謄錄議叙得湖南試用州同借
補常德府經歷歷署常德府同知寶慶府通判益陽知縣
桃源知縣武岡州州同道州州判永州府經歷服官者十
有八年而署任桃源者最久績最著以軍功懋等爲弇山
尚書特列薦剡蒙

恩以應陞之缺陞用然竟以勞瘁卒於位兄幼工書得虞
歐楷法畫學李成能獨出已意尙俠氣善騎射精拳勇壯
年更折節讀書恂恂若訥晚乃研究醫術得孫思邈千金
方而揣摩之活人甚衆其署任桃源也承辦兵差供億軍
械糧餉撫卹難民始終其事者三載桃源人德之體素肥
重食量兼人且無疾以銷算軍需至星沙中痰不起桃源
人聞之如喪所親兄材可大用卒未展其能而賁志以沒
嗚呼家之不幸而數之奇也兄娶顏氏無子以長兄羽庭
之第四子監生懋爲嗣又先卒有三女一適人孫四德寬
德宸德寅德宙兄生於乾隆十一年丙寅五月十六日丑
時卒於嘉慶二年十一月二十五日戌時得年五十有二

茲將以其年月日葬於某鄉某山某向之原其季弟安陽
縣知縣希璜誌其墓而銘之曰

人孰無才才獨難士孰不官官獨閒天畀以才予以官嗚
呼奚爲叔明遇之慳

妾顏氏墓誌銘

顏氏予小妻也本姓王數歲時育於連平顏某遂冒姓爲
顏氏顏予嫻也予以事至連平飲於顏瞥見之因婉轉而
以八十千買得之時戊子之冬予春秋二十有三顏氏以
壬申生年十七越三年庚寅生一女女三歲而天顏氏于
女亡之前二月以癆瘵卒實乾隆之三十六年壬辰秋七
月得年二十有一其卒也予方客於潮陽家人藁葬之祖
祠右側越九年己亥卜地於本鄉坤山艮向之原並其所
生女如珍嫡妻所出女坤姐同葬其主人趙子希璜誌其
墓而銘之曰

以色事人譬如幻身身旣是幻幻卽是真其妾爾靈於茲

室以保抱夫坤也與珍

合葬說

前福建巡撫田公卒於官將以嘉慶三年九月十二日祔葬於先塋禮也其嗣子寶齋持行狀來問合葬之禮於予予烏能知禮雖然予守土官也敢不以禮導民夫禮緣義起律由禮定按檀弓云孔子少孤不知其墓殯於五父之衢人之見之者皆以爲葬也其慎也蓋殯也問於耶曼父之母然後得合葬於防後儒聚訟紛紛轉疑記者之失未知讀者不得其句讀文法而誤也高郵孫邃人先生著檀弓論文謂不知其葬殯於五父之衢十字當連讀爲句蓋殯也問於耶曼父之母兩句爲倒句甚有理蓋古人埋棺於坎爲殯殯淺而葬深孔子父墓實淺葬於五父之衢因

少孤不得其詳不惟孔子之家以爲已葬卽道旁見之者亦皆以爲已葬至是母卒欲從周人合葬之禮卜兆於防惟以父墓淺深爲疑如其殯而淺也則可啟而遷之若其葬而深也則體魄已安不可輕動其慎也蓋謂夫子再三審慎不敢輕啟父墓也後乃知其果爲殯而非葬由問於聊曼父之母而知之蓋惟聊曼父之母能道其葬之詳是以信其言啟殯而合葬於防此殯與葬之分而已葬不忍再啟之說也按例載愚民惑於風水將已葬父母尊長骸骨發掘檢視占驗吉凶者均照服制依毀棄死屍律擬斬發常人墳塚見棺槨者發近邊充軍等語推原律意亡人以入土爲安葬後豈容子孫發掘此科條明布例禁森嚴

也茲閱行狀公之元配牛夫人繼室侯夫人再繼吳夫人
皆先公卒以封翁蕙圃公命祔葬於駱太夫人左側垂二
十餘年矣而或者謂宜啟遷合葬遺孤寶裔是以問禮於
予予曰子盍不觀蕙圃公之命葬乎子盍不觀已葬不再
啟之說乎子盍不觀科條之明布乎有科條之明布則當
恪遵

功令有已葬不再啟之說則當慎守禮經有蕙圃公之命
葬則當追念先人且旣祔葬於先塋同爲一壙而必拘於
俗見同穴之說斯則大謬不然烏可與言禮故予著斯說
以詔令之言禮者

貫休羅漢攷

丙申歲予寓京師法源寺觀貫休水墨羅漢十六幅內缺六幅以元人摹本補入絹色墨色迥別詢之寺僧云是西湖聖因寺舊藏乾隆十六年今

上南幸江浙恭呈

御覽摹勒上石卽今聖因之石塔刻本也原本已歸

天府乾隆二十二年自

內府發出交法源寺僧天月藏弄故予得寓目按貫休自秦入蜀爲僞蜀王建時居龍華精舍因縱筆用水墨畫羅漢一十六身并一佛二大士或曰夢中所覩覺後圖之謂之應夢羅漢門人曇域曇弗甚秘重之蜀主曾宣入內嘆

其筆跡狂逸供養經月却令分付院中僞翰林歐陽炯亦
曾觀之而贈以詩則現存法源寺者爲貫休之水墨本無
疑而光孝所藏寫經伏虎面壁渡海降龍咒鉢六幅丹青
渲染工緻絕倫絹本麤的是唐絹其貫休之別本歟未敢
臆斷壬寅八月同年張葯房招飲版門書屋出新得光孝
咒鉢羅漢圖示予因附記數語以待博洽君子辨焉又按
黃筌善於設色布勢其人物在貫休之右孟昶曾以吳道
子之鍾馗啖鬼圖令筌改其拙指筌沉思累日於原本終
不敢改另畫以進所謂精神全在第二指也庚子春予寓
京師之鐵門從閔正齋寓得觀大興張晴溪比部所藏無
量壽佛設色工緻時人皆謂貫休本予獨疑黃本然大致

頗似光孝羅漢其爲一人之本無疑他日葯房入都尙可
寓目也

擬征邪教疏

今夫救焚者與其渥水以遏火之衝無如徹屋以斷火之路治水者與其築隄以防水之溢無如鑿渠以分水之流蓋徹屋而火自止分流而水自減也賊至之地類皆先時可知莫若令司牧之官預爲曉諭鄉民些小村聚資糧婦女併歸大庄近山者依險爲寨平原者築牆爲堡深溝固壘老弱居守強壯抵禦但能聯絡數十里之地一處如此處處皆然使教匪進無所掠攻無所尅不過旬月勢必解散因其懈而擊之所謂以逸待勞也即使不擊亦不能添襲多人其衆有減無增豈能猖獗此卽古人堅壁清野之謀也側聞賊匪滋擾皆係搶奪口糧戕戮老幼焚燒屋廬

刼制強壯非有攻城佔據之策但爲逃避蔓延之計而官兵所以不能制其命者以賊人虜掠隨地皆糧復裹多人一遇追襲率以所刼之人前當鋒刃至於真賊戰敗先逃官兵探訪所逃之方須得的實加以籌調裝糧卽使卷甲疾趨計已動涉旬日是以邀截之兵每尾賊後而山中路徑多岐官兵難以備悉更加樵采之蹊隨在皆有賊窮輒遁又不必遵由平民素日所行之路也圍剿之說有似難行况醜類非比從前跳梁業已三載蓋衆聚則易殲勢分則難圖也佔據則可圍流徙則難追也接戰則銷滅逃避則蔓延也夫用兵之道寧貴拙速不務巧遲遷延之間積匪成猘事勢釀於四省波累不止一方分閫有人責成奚

屬竊以賊人避戰之情已見分竄之勢旣成使仍戢我前
矛趨其後路是猶擊蛇而躡其尾搏虎而逐之山欲求有
功曷云克濟爲今之計須易良圖賊意在分我誘令合誘
合之法以守爲長夫川陝楚豫橫亘終南荒山本易藏奸
開墾原非土著零星散處防範維艱今旣賊踪潛往慮其
照舊潛來無論所過之區蹂躪定無遺類卽彼聞風之所
逃亡必乏居人宜以山中散居之戶難守之區撤其室廬
遷其積聚况已逃亡之衆業經留養有方募其精壯練卽
強兵廣求險阨之口多築堡障以防陷坑拒馬列在當途
伏弩窩弓布諸徑路空山無所侵掠堅壁難以猝攻彼固
因糧於民而糧不可因借脅於衆而衆無以脅到處皆然

計窮必合又加名關要地厚集弁兵告急聞風星馳策應
若果守之以法應之有方斯賊旣分決不能合縱能合亦
必不能分矣其他設施之方抵禦之術俟指可數請更詳
之一曰官兵可合而不可分也夫兵貴速而不貴遲宜聚
而不宜散散則勢單聚則勢衆今使調萬人之衆置之十
處所用不過千人是已置九千人於無用之地非但虛糜
帑項抑且坐失事機一曰鄉勇可守而不可戰也鄉勇之
設本以衛一鄉之民非但此縣不可調於彼縣卽此鄉亦
不可調於彼鄉此鄉之鄉勇卽令此鄉之強壯者爲之彼
之父母妻孥在是田廬墳墓在是一旦賊來相爲抵敵猶
如手足之衛其頭目腹心有不勇氣十倍者乎假使招募

游手征調他處此固不練之兵卽同烏合之衆用之不當反足以搖動官兵一曰神堂古廟宜預折毀也鄉僻寺觀銅鐵器皿宜廣爲收致也夫深林密箐本易藏奸此等處所設被賊人所佔木植輓轆皆爲攻具銅鐵器皿可作利兵莫若先行折毀廣爲收致以供堡寨之需非但化無用爲有用且變防人者爲自防抑臣聞之將將較難於將兵立法尤貴於行法昔吳宮教戰斬二美人以伸威齊國陳兵戮一貴臣以行令今既有奏陞之官甄錄之幕自當有明法之士降罰之員蓋賞罰者用兵之權衡德威者鼓士之橐鑰古人云賞必先遠而後近則遠人服德罰必先近而後遠則近者畏威誠謂近習之人希澤易而知威難疎

遠之士用力多而受德鮮公道而行勇氣自倍耳

陳拱齋封翁壽序

弋陽縣之西有蓮湖焉湖之大不知其幾千萬頃也縣南有石室焉昔張氏隱此琢石爲室形如困郡守庾翼欲表薦之隱而不見室之中刁刁調調不知其幾千萬竅也明李奎溪山勝覽樓記云葛溪當西南水陸之衝其馬鞍寶峰南岩諸岫莫不爭奇獻秀若渴虹奔騎絡繹而來又李玘葛溪十詠序云葛溪弋陽之別名也介乎閩浙之交山川秀麗稱東南諸邑最我拱齋先生派衍太邱望隆信水居弋陽縣之北鄉其足不出戶庭其氣度如蓮湖之陂其肆志如石室之張其壽考康寧則山川秀麗所鍾如渴虹奔騎絡繹而來者乎其與公之嗣君乙林大令爲齊年生

且同官鄴下乙林時相過從悉公隱德綦詳乙林云公於
行爲第三乙林爲公長子五歲時出繼季父公延師督課
鄉故有天湖寺距所居三里許嵐光林靄塵障一空乙林
肄業其中公三數日輒策蹇往來側耳講席間或辨問明
晰則喜否則終夜不寐乙林得以成立已亥舉於鄉七上
春官不第乙卯以知縣揀發河南試用丁巳咨補臨漳縣
知縣迎公至署臨漳爲鄴中劇縣銅臺高揭漳水東流三
星在天明月滿林公時吟嘯其間致足樂也戊午鄉試乙
林充同考試官瀕行公諄諄以公正廉明爲囑己未三月
南歸赤舄青衫掛帆千里吳越諸山川名勝恣情遊覽精
神益健抵家後寄乙林書云予以八十老人閒遊維揚過

揚子江登金山遠望海門眼界曠如憶子瞻凌虛堂遠混
天碧之語不禁作飄飄想更值天日晴和風平浪靜念爾
在宦途能如我者一番風景便佳因書一聯以誌云河北
民情階下得江南春色客中收乙林爲某言者若此茲以
六月二十二日爲公八旬初度介某一言爲壽夫壽之爲
言久也若蓮湖若石室若葛溪若馬鞍若寶峰若南岩皆
以久而壽則某所以壽公者卽以蓮湖石室葛溪馬鞍寶
峰南岩之最久而壽者爲公壽爾

勅授文林郎晉封奉直大夫湖北棗陽縣知縣黃景

亭府君墓志銘

昔劉梁除北新城長告縣人曰文翁在蜀道箸巴漢庾桑
瑣吏風移礪礪吾雖小宰猶有社稷苟赴期會理文墨豈
本志乎廼更大作講舍聚生徒數百人朝夕自往勸誠身
執經卷試策殿最儒化大行此邑至後猶稱其教焉吾鄉
黃公之治棗陽其政績類是公諱叔傳字仰度號景亭又
號梅溪以乾隆癸酉選拔中式己卯科順天鄉試副榜充
景山教習官館滿銓選湖北棗陽縣知縣是乾隆之四十
六年三月也公下車之日愀然以民風士氣爲患常語人
曰親民之官得民爲本土爲民首得士爲先於是除奸剔

暴懲陳紹宗呂作周吳三鄣四等若干人決獄如流案無停牘而棗之民大和聚生徒勤勸誠凡三載而士風丕振以甲辰春兼署襄陽縣事失察西洋人過境致呈吏議去官棗之士民攀轅泣下者凡數千人旋以庚戌慶賀

聖天子八旬萬壽開復原官遂絕意進取優游林石於嘉慶二年戊午九月初九日未時疾終正寢距生於雍正十年壬子閏六月初八日卯時得年六十有七有丈夫子二人輝雲廩貢生候選州同書雲監生女子一人適貢生顏楷孫六人錫琮錫璉錫寶錫璵錫宴錫宸以嘉慶三年十月某日葬於田源大光坪乾山巽向之原余鄉距公之居廿餘里少時昕夕過從仰公如泰山北斗矣辛亥春余自

關中蒙

恩旨送部引見抵都門聚首者六閱月公送余赴夏邑任
話別至達曙嗚呼詎意遂成永訣也因爲銘曰親民親士
身爲先惟其道周性廼全峴山之碑雲漫漫輕裘緩帶風
翩翩

皆旂說

說文皆四皆也詩大雅曰止曰時築室於茲傳可以止於是而築室矣王粲七釋不以志易道不以身後時進德修業與時同理又按詩一葦杭之傳杭渡也箋云誰謂河水廣與一葦加之則可渡之喻狹也說文抗扞也从手亢聲苦浪切抗或从木臣鉉曰今俗作胡郎切抗方舟也从方亢聲禮天子造舟諸侯維舟大夫方舟士特舟臣鉉等曰今俗別作航非是胡郎切是航以渡言宜从木以舟言宜从方說文舟船也古者共鼓貨狄剡木爲舟剡木爲楫以濟不通象形凡舟之屬皆从舟方併船也象兩舟省總頭形凡方之屬皆从方淮南子公孫龍在趙之時謂弟子

曰人而無能者龍不與游有客衣褐索帶而見曰臣能呼
公孫龍曰與之弟子之籍後數日往說燕王至於河上而
航在一汜使善噓者噓之一呼而航來故曰聖人之處世
不逆有伎能之士茲故人子歸善黃大元堪自號曰峇航
其不以身後時與其善呼而航來與時哉時哉諒爲伎能
之士當如是爾

漳河天平閘故渠圖說

按西門豹史起導漳水治渠實得職方之遺其後率循者皆食其力後漢書安帝紀元初二年春正月修理西門豹所分漳水爲支渠以溉民田注史記曰西門豹令鄴發人鑿十二渠引水灌田所鑿之渠在今相州鄴縣西也曹魏時有天井堰故魏都賦云塏流十二同源異口也元魏時有萬金渠東魏時築漳濱堰北齊時有河清渠至唐至德時皆廢惟汴宋時欲復之而未果宋史王沿傳天聖四年二月沿言史起爲鄴令鑿十二渠引漳水以溉斥鹵之田而河內饒足唐至德後渠廢而相魏洛磁之地濱漳水者累遭決溢今皆斥鹵不可耕夫漳水一石其泥數斗古人

以爲利今人以爲害繫乎用與不用者耳請募民復十二渠渠復則水分水分則無奔決之患可使數郡瘠鹵之田變爲膏腴詔河北漕司規度而洛州倅王軫言漳河岸高水下未易疏導又其流濁不可溉田八月沿又奏渠田起於魏襄王時但紀灌溉之饒不言疏導之法惟相州圖經載天平堰魏武帝所作凡二十里分十二堰相距二百步互相灌注一源分爲一流皆懸水門所溉處名晏澤陂然則爲渠之法必就高阜鑿岸爲渠截流爲堰然後水行數里方至平田若渠開二丈四尺則作堰之功可損其半日役萬人五十日而罷扼中流以作堰下流大渠分置水門東入於衛河或水盛溢則下版閉渠以防奔注復三百年

之舊迹溉數萬頃之良田雖役百萬數載而畢未足爲勞
況此五旬之力哉奏寢不行康熙時彰德同知李光型天
平閘說魏鄴令西門豹引漳水溉田以富魏之河內史載
是事爲水利之權輿然其迹久湮余巡歷河干訪得天平
閘舊址在西高穴村濱河高阜閒屬今安陽縣地非臨漳
也其閘石前後上下左右至今完具閘設兩門各濶八尺
五寸自頂至底高一丈五尺長四丈七尺河發水漲流可
至閘門退則不及土人云古於閘外開引渠一道由漁洋
渡口河身高處引水入閘長二百六十丈今以水平測量
水頭高閘門底二丈其閘門內正渠經東百餘丈轉南舊
有子閘一座基石尙存復轉東至東高穴村界又有小閘

一座年久被土壅塞蓋自西高穴村至東高穴村正渠長六百餘丈兩岸高三四丈寬二三丈至四五丈內有支渠一道係張胡頂洩水之處自東高穴村至邵家屯正渠長三百餘丈兩岸高三丈餘寬二丈餘內有支渠一道在張顯屯後自邵家屯由郭家屯小洪河村至李家屯止正渠長一千四百餘丈兩岸高三三尺至七八尺內有支渠六七道經張家庄劉家屯後蔡村東自李家庄崔家庄至後靜曲村長八百餘丈此二庄有渠形無渠道渠道已爲民所耕種自後靜曲至三十里鋪止渠長二千四百餘丈兩岸高三三尺寬七八尺至一二丈內有支渠一道經華村店自三十里鋪大路東由華村街往東南至小華村正渠

長五百餘丈兩岸高二三尺至七八尺寬七八尺至丈餘
內有支渠一道經臨漳界自小華村至郝家小庄入大青
龍渠長三百餘丈有渠形無渠道渠道亦爲民所耕種自
大青龍渠達青龍河入洹河長四十餘里現在疏通自西
高穴村至大青龍渠入洹河共長七十餘里滙歸衛河大
抵古人設立水利必先明其水土之性漳河水性悍急而
自漁洋以下濱河之土極疏所以設有子閘以護大閘復
設有小閘以防岡水其措置之周密如是至設大閘在山
岡高阜之上因水勢之高如建瓴開鑿小渠引入山岡石
骨之內托基始固而引渠分流勢復紆徐此尤其用意之
精微且有合於納水用山之說也嘉慶五年庚申三月初

三日余至西高穴村裴裴竟日歸作斯圖並纂說以詔來者

故揀選知縣方甫顏君墓識銘

庚申九月余長兄之女夫顏君耘甫寄余札述其弟方甫
孝廉客亡之戚余飲泣終日爲位哭之哀手疏慰耘甫今
年五月耘甫來撫中州道出安陽謂余曰將舉孝廉樞歸
葬連平以余視孝廉有父執之誼請識銘於余先是乾隆
戊子余姻家靜山侍郎以憂歸孝廉才四歲卽知自持未
嘗逐隊嬉遨尤有至性依依侍郎前出入必偕余因事至
侍郎家孝廉肅客正襟危立侍郎睨之笑撫其頂曰兒果
不凡庚子余計偕北上主侍郎之宣武坊南鐵門寓邸值
侍郎撫黔去耘甫殯母未來孝廉偕弟蔭沅慙歎歛賓奉
酒饌盡夜分每要余書書欹斜或不終幅爭弄置不忍棄

是秋七月侍郎卒於黔耘甫倉卒入都門要余同舟歸更
闌燭炮孝廉對侍郎遺像淚泫泫墮余重孝廉至性益悲
侍郎曩日言也乙巳余謁選都門孝廉先一年昏於莊氏
是春恭逢

臨雍盛典孝廉以復聖齋陪祭

恩賞主簿銜耘甫時在祠部行走孝廉惟兄嫂是依余僦
居法源寺日相過從意致恬如辛亥余以署陝西平利縣
任內獲四川劇盜蒙

懇旨送部引見而孝廉先三年失偶矢志不再娶余重孝
廉之義以兄叔明女孫字其長子嵩齡迨余選授夏邑縣
知縣孝廉送余赴豫視余行立意獨惘惘余行後數日思

之尤憮然益嘿重其天性喜老成知侍郎之有子必有以
世其學癸丑夏耘甫以禮部郎出守吉安孝廉偕行是冬
耘甫升任雲南鹽法道孝廉歸粵甲寅與弟蔭沆同赴省
試中式第二十二名舉人而蔭沆則以第十三名與孝廉
同榜策經進

呈主試爲刑部郎中今惠潮嘉道胡公克家內閣學士兼
禮部侍郎前翰林院修撰錢公棨同考爲仁化縣知縣萬
公應馨嘉慶己未耘甫升任河南布政使旋調任直隸布
政使孝廉與蔭沆會試後偕赴官署庚申春余長子惺之
官浙江邀其同至安陽余復敦札促之孝廉對惺兒淚沾
衣裾追叙舊事刺刺終夜而竟不來惺兒歸述其言余甚

訐之今獨奈何歿耶孝廉名模字方甫號印川乾隆甲寅
恩科舉人揀選知縣廣東惠州府連平州人實生於乾隆
三十年乙酉八月初九日寅時卒於嘉慶五年八月二十
五日酉時得年三十六歲配莊氏生於乾隆三十年乙酉
七月初九日某時卒於乾隆五十三年七月某日時得年
二十三歲莊無子妾石氏生子四人嵩齡慶齡增齡衍齡
女一人高祖諱秉元曾祖諱子純長寧縣儒學訓導祖諱
容穆候選訓導三世以侍郎貴

誥贈光祿大夫兵部左侍郎加二級妣皆一品夫人父諱
希深歷官兵部左侍郎湖南雲南貴州巡撫妣卜氏封一
品夫人耘甫謂余曰孝廉得癆症身日尪瘠懼傷兄嫂心

強支持不言所患易簣時諄諄屬耘甫做好官毋墮先侍
郎清德耘甫述之慟余益滋慟今葬有期屬先期爲銘余
忍不銘以重耘甫慟銘曰

嗚其生也材其性也善何天速奪其算邪天乎天乎災何
熾邪疇

誥授通奉大夫江寧等處承宣布政使司布政使陶

悔軒府君墓識銘

陶悔軒先生卒後二十有一年嘉慶戊午先生之孫象炳來令內黃與希璜同官持先生行狀乞識於希璜曰先生任布政使時乾隆戊戌以徐述夔案被逮入都疾篤遂歿象炳孤苦零丁不能自立今得微祿養親將殯先生喪丐子次其生平識其顛末銘諸貞珉昭諸來世希璜辭不獲已因敬識之按狀先生姓陶氏諱易字經初號悔軒先世祖某洪武間官威海衛指揮僉事世襲遂爲文登人八世至高祖某始就儒術充廩膳生曾祖諱希聖青城縣儒學訓導妣李氏祖諱威鳳荏平縣儒學教諭妣王氏生四子

張元士雍正壬子科舉人次本生父諱正士號方崖雍正
癸卯選拔貢生任江西長寧縣知縣妣呂氏父諱申士縣
庠生早世妣呂氏苦節奉

旌事詳縣志次彤士縣庠生自訓導公後以先生貴封贈
如先生官妣皆夫人先生由方崖公次子入繼呂夫人撫
孤教養家故貧霜風雪夜燃松煨芋以飼先生先生能仰
體夫人心機聲與書聲齊徹也年十七補諸生隨食餼乾
隆甲子考取優貢生肄業國子監己巳考取入旗教習官
壬申應京兆試中式舉人主考爲孫文定公嘉淦介少宗
伯福同考官爲夏醴谷先生之蓉旋以教習期滿引

見奉

自以知縣用甲戌揀發湖南試用厯署桃源武陵安化安
福瀏陽等縣楚俗號稱健訟先生抑強扶弱發奸摘伏咸
誦神君丁丑補益陽縣知縣己卯調衡陽縣知縣癸未兼
護府篆有衡陽病瘋人在廣西提督衙門投遞逆詞粵撫
馮公楚撫喬公駐衡陽查辦衆心惶惑先生以鎮靜處之
祇取病瘋人正法家屬俱免緣坐衆心允服是冬

命下直省督撫保舉堪勝知府喬公首以先生名入

告甲申引

見擢山西直隸平定州知州己丑

簡放江蘇淮安府知府先生益感激悚惶奮勉圖治辛卯
冬淮關監督署內被刦

聖諭嚴切督撫駐河干查拏賊盜或擬將板閘居民盡拘
刑訊者先生力爭不可而止後獲盜果非附近人大府由
是益器重先生甲午秋黃河漫溢水灌郡城先生詳請大
府賑撫兼施率屬親給無濫無遺是冬調江寧府知府因
俸滿引

見蒙

天語垂詢被水情形及賑撫事宜先生敬謹條對

溫旨嘉納甫回任卽升授惠潮嘉道閣部高公晉專摺奏
補江安糧道丙申春奉

命擢授江寧布政使是夏赴熱河

行在陛見蒙

恩賜克食

召見者再

諭令速回辦理淮徐災務先生星馳回任順道挨查一如在淮安時戊戌夏有已故舉人徐述夔詩集違礙經蔡某首告批府查辦未催詳覆蔡某又赴學使衙門具控致先生被逮行至韓庄疾發勢遂沉重入都後延至十日而卒先生生於康熙五十一年壬辰十月二十日某時卒於乾隆四十三年戊戌十月二十七日丑時得年六十七歲配于夫人與先生合德生於康熙五十一年壬辰六月二十三日某時卒于乾隆四十六年辛丑十月二十八日卯時得年七十歲子五人曾履歲貢生東昌府儒學訓導廣西

候補通判曾恒江西試用布政司經歷借補鄱陽縣縣丞
曾晉府學廩生曾同監生曾過附生孫九人象炳順天己
酉科副榜河南候補同知借補浙川縣知縣象煊候選鹽
運司知事象綸附生象紱象綬象繡象組象珮附生象圖
曾孫一人曾孫女一人茲以嘉慶七年某月日合葬先生
於祖塋側某山某向之原蓋距卒後二十有五年矣象炳
署內黃縣知縣時用希璜言獲奸民張標奉
特旨擢官同知卓卓有祖風克光顯先德無疑也因識先
生墓而爲銘曰

維賢克賢維孝克孝厥母克貞厥孫克肖懿矣端醇抱樸
守貞俛仰就範績栗而溫豈楚有材豈晉實用晉楚循聲

弦歌雅頌黃水滔滔淮水湯湯榮穀饑饉鴻鴈哀傷

帝曰汝賢擢淮安守用酬懋績以悅黔首廼

命觀察廼進旬宣安集流離賑撫顛連翼翼小心惕惕終
日胡邁閔凶爨起倉卒恍兮顏山惚兮委梁銘之元石永
識令望

趙殤女巽英墓識銘

殤女巽英爲余之長孫女余遷方山新居之次歲乙巳殤女生時余謁選都門接兒子惺書余有句曰二十汝今生女早四句我正服官初蓋紀實也越丙午余以知縣分發陝西越庚戌內子攜眷口至陝僑住西安而第三女孫天歿越辛亥殤女之母黃氏媳又復病卒時余赴部引

見接兒子惺書爲詩哭之曰母女後先淪異地傷心不禁淚成河幾人宦海同余險偏是新愁客裏多蓋自傷也是年秋選授夏邑縣知縣瀕行以殤女許字禮部儀制司郎中今直隸布政使顏君檢之長子兆甲爲室顏爲余長兄之女夫而其幼弟植又爲余之女贅也次年壬子爲惺兒

娶商邱葉氏女爲繼室葉撫二女孫如已出余甚安之是
秋調任安陽越乙卯長孫崧孫生越丁巳崧孫殤異英哭
之慟故余悼崧孫句曰含飴二女依肩立哭弟聲聲喚奈
何越戊午惺兒應京兆試去異英以八月十八日亥時病
殤余作書寄惺兒蓋不覺淚漬于紙也殤女以乾隆乙巳
五月初四日巳時生得年十有四歲旣不能歸諸顏氏脂
其成人復不能歸葬長寧附其母墓爲之擇地柿旺村高
原以妥亡魄亦可哀也已銘曰生不辰未成人息雖賤食
同貧嗟瘥爾骨洎河濱豈其悶悶而醇醇

與顏耘圃侍郎書

耘圃足下希璜於六月十九日將安陽縣印交替訖已無
官守責矣曩以嫌疑之際緘嘿不言今以蕭散之身進退
由我雖居之卑行之汙未必言之陋也夫言不厭多故騏
驥不能與罷驢爲駟鳳凰不與燕雀爲羣而賢者亦不與
不肖者同列故君子處卑隱以辟衆自匿以辟倫微見德
順以除羣害以明天性助上養下多其功利不求尊舉旨
哉季主之言此宋賈忽而自失芒乎無色也李靖爲布衣
時謁楊越公曰方今多事之時足下不宜倨見國士越公
改容謝之足下銜

天子命遠守邊圉川陝教匪日有窺伺豫東之意正足下

延攬國士之秋講求武備因材器使茲蒞豫將屆兩月未
審謀畧之士爲誰技勇之夫爲誰想足下鴻才大畧布置
周詳必有以上慰

宸衷者希璜待罪中州十有一載親不敵貴引避足下本
不應抵掌譚事如馮婦之所爲效毛遂之自薦然目擊時
艱心神慘怵有不忍不向足下詳言之者一曰邊防宜扼
要也豫省最緊者鄧州浙川內鄉盧氏四州縣耳其餘次
緊之區亦不過四五處合一州一縣之民足以扼其要害
卽慎選一州一縣之官足以得其要領夫守令親民下情
易於上達今賊曰官逼民反民則曰兵甚於賊官旣能逼
民反是官亦能使民不反兵旣更甚於賊是兵不能制賊

不反則不如仍寓兵於農慎選守令堅壁清野各守一州一縣之足以制賊也然獻堅壁清野之說者類皆迂濶不經無裨實用則所謂壁者非壁何可言堅旣無堅壁何可清野夫所謂壁者卽以一州一縣之城池而論也一州一縣之城池卽豫東九十餘州縣之扼要也此其一一曰江防宜嚴密也夫十圍五攻志載之矣今以少制衆所恃者江防江鄉勇類皆游手之徒烏合之衆緩急果足恃乎是宜仿甬道之式令防江鄉勇於無事之時運石運土凡可偷渡之處多築甬道旣足以自衛亦足以拒賊人窺伺所謂守者自逸而攻者自勞也此其二一曰糧儲宜預畫也夫善用兵者役不再籍糧不三載取用於國因糧於敵遠

輸則百姓貧貴賣則百姓財竭故智將務食於敵食敵一鐘當吾二十鐘今以萬人之食每月不過三千石萬人之餉每月不過三萬兩誠能於鄧淅內盧四州縣各儲糧六千石銀三萬兩以備不虞賊至則堅壁守之俾野無可掠賊懈則悉萬人敵之使退無可據不出旬月勢必解散其餘次繁州縣半其儲蓄以待轉運斯無遠輸之煩而收賤買之效矣此其三若夫臨機制勝變化因心縱反問者善用亡命養壯士者不惜重賞是固足下思之爛熟者也希璜將長揖歸田不復預聞在位之事兩牕縱筆作此狂譚幸足下諒焉

贈修職郎湯陰縣儒學教諭趙公家傳

贈公諱湜字碧天延津縣人以子樓仕湯陰縣教諭贈如樓官樓爲余乙卯分校所取士述公事綦詳屬爲作傳夫傳之爲言傳也將以傳信後人也子孫閱之如聞其聲如見其人世世守之毋隕令緒也樓爲余言曰公初補胙城縣諸生後胙城歸併延津遂爲延津縣增廣生家於汲又爲汲縣人公於書無所不讀性孝友母歿後奉父寢處十餘年未嘗入私室兄澄早卒嫂無出公敬之如兄甫生長子松卽出嗣兄後事寡嫂三十餘年無間言族黨中孤幼無依者收養之教其成立貧乏者殯葬嫁娶量力扶助之

以爲常儉薄敦醇樸鄉里稱孝友公之潛德若此趙希

璜曰士夫不獲致身通顯力敦善行維持風化可爲百世
師天下法而卒湮沒弗傳何可勝道若公孝友其章章者
也

武徵君傳

徵君名億字虛谷河南偃師縣人以乾隆庚子進士官山東博山縣知縣治甚有聲民歌思不忘其罷官也以懲番役事天下器之士夫敬焉

今上廉其枉

徵赴京師君已先卒事載墓識其友人安陽縣知縣趙希璜爲之傳曰君遠通經術相貌魁岸家無儋石儲晏如也徵時伊洛水溢屋圯架洿隰以居誦讀不輟斧朽木燎寒傷足血殷不顧壯遊京師著或謂云虛谷子寄居京邸歲易三終俚獨孤默不知取容或有人焉過而憐之謂曰守雄守雌不滯于時一龍一蛇神匿無涯夫惟喆明汙處隱

約默不內兵歛不外爍故以騰擲彷徨翱翔遼廓今子頑
鈍無顏木強自膜崖岸高標町畦迂錯固已失意吹雪之
彪浸笑沐冠之攫而又何爲自縛于跼步徒甘此落落且
世有批鱗不觸能致淵龍下窺于庭叅之投其欲也履尾
不狗坐籠啗虎自入于檻服之委其順也故車或載脂而
轉舵或引繩而連或藉蒲而可紉或編席而易卷或淘金
而就冶或揉木而成捲或藏器而應變或不材而終年莫
不毀其方孔鑿以大圓所願知默知玄不爲世訾室隙塞
瑕蹈道而止服按絃之遺規篤佩韋之秘旨於以婉輒輕
便周旋徙倚逢世之甘挾身之否乘軒策肥垂纓結綺故
謂子將乘時而起計無踰于此矣虛谷子聞而應之曰固

也如客之欲吾貶損以行也然剝椒蘭之實而遺其英剝
薑桂之性而採其平亦豈非言之類于盲邪曩者權蠹相
朋橫滋明藥盤互鼎鼎偶時幸竊腥附羶歸肩脅腰折大
官唱聲庸夫咋舌習熟見聞覲顏泄泄當此之時盜權擅
威予提弓挈黨之者廉來譽之者稷契於是志士苦心匹
夫亮節迸激淚零拊躬沫血項乃可強齒乃可齧首乃可
懸脰乃可絕此非所謂人慕顧以行而獨爲揭耶故汲黯
抗顏而爲揖客寬饒負氣而目酒狂望之不肯錄錄子橫
不虛觥觥朱雲折檻于殿上張綱埋輪于洛陽奮身以效
蹇步矯立懷其剛腸彼皆秉風霆之勁爭日月之光懷丹
石之礪挺竹箭之蒼夫然後以噴薄激昂諤諤蹇蹇任其

朴愚忘其狂偏而且以振聵矇逐婉變使天下聞此風者
山慕而景從節彰而名顯固已善矣且夫知而不舉飲聲
暗聾爲而不力委形痺癰溷跡乾沒猥號中庸突梯卷轡
脂韋巧逢欲使馮依社城饜貪鼎餽混混與偕保身不辱
然而滑正恬禍濟惡擠讎徒俾目盈其怒口貽其羞戮辱
之所必及典憲有所必收由斯觀之彼嬖媚而求媚者固
不足與謀也夫寓形宇內惟適所逢意趨其吉反罹于凶
自昔伯鯨婞直亡爲厲墟聞人順非爰喪厥軀伍員子子
奮殉屬鏤宰嚭佞戔身死名虛然則凡物之理本不願材
斧斤亦災鴈不能鳴身或遭烹宰又何以忍默恕行愿懸
鉤錄規人于選悞之圖懼予以狗名之覆且士各有志人

亦有能有不能竭搏象之勇或不足以卻蠅殫夏蟲之智
終不足以語冰今以予之自度剛不知柔愚則成慙竊比
古狂未悔用壯兀傲嶮崎與世骯髒而又念夫奮身蹴爾
抗志嗟來踔厲而蹈不顧幸媒吾惟思所以得正而斃求
獨免于詭隨吁嗟乎客之所謂其奚以予爲君官博山甫
七閱月以經術治民間土俗利病釐比邱尼勸節儉創范
泉書院進其秀者躬親講授革煤炭供饋里馬草豆決辭
無留獄輿情大洽去官日民攜老弱入省幾千餘人乞留
我好官君勇於著述有經讀考異羣經義證三禮義證授
堂劄記金石三跋詩文集百餘卷藏於家卒年五十五歲
大興朱石君尙書爲之識墓以昭其懿德

論曰忠臣不私私臣不忠履正奉公臣子之節此善事上官任長孫不敢奉詔也虛谷循循儒者顧以懲番役罷官或疑近於叱奴下車數主之失然其不能善事上官後世必有以諒之者矣

再與耘圃論川楚兵事

今之川楚亂民固赤子弄兵於潢池中耳欲其急平而轉緩者何也按龔遂傳載勃海左右郡歲饑盜賊並起二千石不能禽制上選能治者丞相御史舉遂可用上以爲勃海太守時遂年七十餘召見形貌短小宣帝望見不副所聞心內輕焉謂遂曰勃海廢亂朕甚憂之君何以息其盜賊以稱朕意遂對曰海瀕遐遠不霑聖化民困於饑寒而吏不恤故使陛下赤子盜弄陛下之兵於潢池中耳今欲使臣勝之耶將安之也上聞遂對甚悅荅曰選用賢良固欲安之也遂曰臣聞治亂民猶治亂繩不可急也唯緩之然後可治臣願丞相御史且毋拘臣以文法得一切便宜

從事上許焉加賜黃金贈遣乘傳至勃海界郡聞新太守
至發兵以迎遂皆遣還移書勅屬縣悉罷捕逐盜賊吏諸
持鉏鉤田器者皆爲良民吏毋得問持兵者乃爲盜賊遂
單車獨行至府郡中翕然盜賊亦皆罷勃海又多刼畧相
隨聞遂教令卽時解散棄其兵弩而持鉏鉏盜賊於是悉
平又後漢書永和二年日南象林徼外蠻夷區憐數千人
攻象林縣燒城市殺長吏交阯刺史樊演發交阯九真二
郡兵萬餘人救之兵士憚遠役遂反攻其府二郡雖擊破
反者而賊勢轉盛會侍御史賈昌使在日南卽與州郡并
力討之不利遂爲所攻圍歲餘而兵穀不繼帝以爲憂明
年召公卿百官及四府掾屬問其方畧皆議遣大將發荆

揚兗豫四萬人赴之大將軍從事中郎李固駿曰若荆揚無事發之可也今二郡盜賊槃結不散武陵南郡蠻夷未緝長沙桂陽數被徵發如復擾動必更生患其不可一也又兗豫之人卒被徵發遠赴萬里無有還期詔書迫促必致叛亡其不可二也南州水土溫暑加有瘴氣致死亡者十必四五其不可三也遠涉萬里士卒疲勞比至領南不復堪鬪其不可四也軍行三十里爲程而去日南九千餘里三百日乃到計人稟五升用米六十萬斛不計將吏驢馬之食但負甲自致費便若此其不可五也設軍到所在死亡必衆旣不足禦敵當復更發此爲刻割心腹以補四支其不可六也九真日南相去千里發其吏民猶尙不堪

何況乃苦四州之卒以赴萬里之艱哉其不可七也前中
郎將尹就討益州叛羌益州諺曰虜來尚可尹來殺我後
就徵還以兵付刺史張喬喬因其將吏旬月之間破殄寇
虜此發將無益之效州郡可任之驗也宜更選有勇畧仁
惠任將帥者以爲刺史太守悉使共住交趾今日南兵單
無穀守旣不足戰又不能可一切徙其吏民北依交趾事
靜之後乃命歸本還募蠻夷使自相攻轉輸金帛以爲其
資有能反間致頭首者許以封侯列土之賞故并州刺史
長沙祝良性多勇決又南陽張喬前在益州有破虜之功
皆可任用昔太宗就加魏尙爲雲中守哀帝卽拜龔舍爲
太山太守宜卽拜良等便道之官四府悉從固議卽拜祝

良爲九真太守張喬爲交趾刺史喬至開示慰誘並卽降
散良到九真單車入賊中設方畧招以威信降者數萬人
皆爲良築起府寺由是嶺外復平又康熙十二年范承謨
疏請興兵屯畧云臣聞古之善用兵者皆於軍興旁午之
秋舉行士卒屯糧之法悉獲成效漢趙充國興屯而敝先
零魏武屯田許下得穀百萬諸葛亮分兵屯田軍食不匱
唐郭子儀屯於河中決機行陣畢誠募士開營田歲省度
支數百萬緡元初征討每遇大敵屯田以守明洪武撥軍
三分守戍七分屯種養軍百萬不費民間一錢豈古今不
和及耶我

朝興屯之法寓諸墾荒一行於招民募墾一行於安插投

誠獨兵屯未聞肇舉蓋因坐食驕卒一旦率作南畝自食其力永無糧糗之望所以畏憚不行臣謂行之有法兵心未有不樂從者卽今枵腹之卒前此之餉勢不能待將來之餉杳不可期一旦給以現餉卽驅之鋒鏑誰不爭先況耰鋤種植之事乎從前墾荒之民例以六年起科則此屯種之兵亦俟六年之後始裁其餉仍於旱澇之年倍加賑恤是兵旣餉六年之現餉復得田畝之收穫又不憂意外之災荒誰不願興屯乎臣謂興屯更有五便兵之需餉必取於民司農仰屋守牧催科民髓日枯財源日耗矣而披堅執銳之卒率皆驚悍不馴無恒產以繫屬其心則渙而難固無操作以勞瘁其力則惰而圖安無生計以寬其日

用則庚癸時呼惟是兵屯之法行將見金錢可省

國用恒足便一也追呼不迫民漸休息便二也防卒變爲土著堅門戶固藩籬便三也有事則戰無事則耕進可攻退可守便四也兵皆溫飽分爲臂指聯爲心膂消戢反側便五也至於地方有不盡宜於屯者臣謂又當因時而制宜屯可行於一處卽一處受利屯可行於數處卽數處受利屯得一兵卽省一兵之餉屯得數十百千之兵卽省數十百千兵之餉兵法云屯田一石可當轉輸二十石非虛語也誠能取龔遂勝之安之之說以治川楚之亂民取李固弋不可之說以選川楚之守令取范承謨五便之說以屯川楚之逆產庶不致賊與民習民與兵仇而收拯民於

水火之實效乎

贈封文林郎臨漳縣知縣陳拱齋先生墓識銘

嘉慶七年歲在壬戌正月甲戌拱齋先生陳氏卒其降服子瑞圖以訃告希璜爲位哭八月瑞圖告葬期徵銘因序而銘之先生諱星字惠揚父逢源娶吳氏生子晨而卒繼蔡氏無出妾熊氏生子昂次先生次景景卽瑞圖所後也先生貞足以揭德曜足以振華內外完好色夷氣清年二十九遭逢源公喪毀幾滅性母蔡得廢疾朝夕侍糞除必親晨早殤昂與景相繼歿且無嗣先生友于最篤至是益憊憊矣孤苦伶仃卓然自立體先人心以子瑞圖嗣景後子瑞班嗣昂後其孝友章章者也有族子某五歲時父賣爲僧逢源公爲之贖身迨先生持家政復爲之昏娶又有

內戚某三歲時失怙恃先生携歸家中教其成立性伉爽
好直言規人有某某爭山界構訟先生知其所爭處爲已
業極力排勸某某不聽先生出契示之曰我不願爲已有
中分爲兩家界何如某某愧服其隱德若此乾隆己亥瑞
圖舉於鄉乙卯瑞圖以知縣揀發河南嘉慶丁巳補臨漳
縣知縣先生就養來署年七十有七越己未三月南歸赤
寫青衫掛帆千里遊吳越諸名勝幾遍寄瑞圖言曰余過
揚子江登金焦二山望海門曠如憶子瞻凌虛堂遠混天
碧語不覺作飄飄想更值天日晴和風恬浪靜念爾在宦
途如我者畚風景便佳因爲小詩云二千里外盪歸舟廿
四橋邊羨勝遊河北民情階下得江南春色客中收其老

而曠達若此先生生於康熙六十年辛丑閏六月二十二日辰時卒于嘉慶七年壬戌正月初二日亥時得年八十二歲配詹孺人生于康熙六十一年壬寅十二月十八日卒於乾隆二十一年丙子三月初五日繼丁孺人生於雍正六年戊申七月初八日卒于嘉慶七年壬戌四月二十八日以瑞圖官知縣封贈如瑞圖官子三長瑞圖次瑞班俱出嗣次瑞堂郡庠生女一適同縣庠生方致昂孫六詔寬豹寬德寬珂寬饒寬博寬孫女六茲于某年月日安厝於本縣某山某向之原希璜於瑞圖爲齊年生同官鄴下分最深誼最篤先生之來也不能事之先生之逝也敢不銘之銘曰

士之窮也節義見孤兒伶丁少也賤不猗不訾絕塵絆厚
德載福昌後宦

魏王伯輿殘碑跋尾

是碑上下殘泐存文十九行三百七十字首行載于有成
父者出仕於齊獲狄榮如孫湫違難爲萊大夫遂缺共二
十有二字按左傳文十一年傳齊襄公之二年鄭瞞伐齊
王子成父獲焚如之弟榮如成十八年傳齊使清人殺國
勝國弱來奔王湫奔萊注湫國佐黨襄六年傳齊侯滅萊
萊恃謀也晏弱城東陽而遂圍萊王湫師師及正輿子棠
人軍齊師齊師大敗之丁未入萊萊共公浮柔奔棠正輿
子王湫奔莒莒人殺之注湫故齊人魏志王基傳基字伯
輿東萊曲城人也首行云云當表其上世耳以下屬句者
稟天素皓爾之質兼苞五才缺德之茂慈和孝友元本道

化缺思六經剖判羣書綜核無形忠正足以格非兼文武

之上略懷濟世之宏規按蜀志劉巴傳注足下天素高亮

似是稟字上有缺文當以缺稟天素皓爾之質兼苞五才

缺德之茂爲句又舉孝廉司徒辟州輒請留以自毗輔後

辟大將軍府拜缺國典惟新出爲安平安豐太守敷崇惠

訓典刑惟明缺躬以允帝命遷荊州刺史揚武將軍又遷

使持節鎮南缺穴朱旗所麾前無交兵克敵獲傷斬首萬

計賜爵關內缺齋諸夏震蕩王師雲集公翼亮缺無遺策

舉無廢功故能野戰則飛虎摧翼圍城則鯨鯢缺於九有

也比進爵常樂亭安樂鄉東武侯食邑五千戶缺之筭征

有缺之威而忠勤之性乃心帝室屢奏封章缺彌留年七

十二景元二年四月辛丑薨公天姿高素與缺亡則令儉

歛以時服於是缺將矩奉冊追位司空贈以東武侯蜜印

綬送以輕車不缺泰山之速頽恨元勛之未遂俯仰哀歎

永懷慘悴以爲缺竿鏤石表墓光示來裔其詞曰缺塞憲

章墳素昭此物則居則利貞在公畢力化流二邦缺寧民

是用息升降順道德讓靡武曾不愍遺我缺按本傳黃初

中察孝廉除郎中是時青土初定刺史王凌特表請基爲

別駕司徒王朗辟基凌不遣凌流稱青土盖亦由基協和

之輔也大將軍司馬宣王辟基未至擢中書侍郎碑云舉

孝廉司徒辟州輒請留以自毗輔後辟大將軍府盖指此

又本傳遷安平太守公事去官大將軍曹爽請爲從事中

即出爲安豐太守曹爽伏誅基嘗爲爽官屬隨例罷其年
爲尙書出爲荊州刺史加揚烈將軍隨征南王昶擊吳基
別襲步協於夷陵取雄父郎閣收米三十餘萬斛虜安北
將軍譚正納降數千戶於是移其降民置夷陵縣賜爵關
內侯碑云出爲安平安豐太守遷荊州刺史揚武將軍又
遷使持節鎮南缺克敵獲僇斬首萬計賜爵關內缺蓋指
此又本傳高貴鄉公卽尊位進封常樂亭侯母邱儉文欽
作亂以基爲行監軍假節統許昌軍欽等已平遷鎮南將
軍督豫州諸軍事領豫州刺史進封安樂鄉侯淮南初定
轉基爲征東將軍都督揚州諸軍事進封東武侯常道鄉
公卽尊位增邑千戶并前五千七百戶景元二年基薨追

贈司空謚曰景侯碑云比進爵常樂亭安樂鄉東武侯增
邑五千戶景元二年四月辛丑薨將矩奉冊追位司空贈
以東武侯蜜印綬蓋指此惟揚烈將軍作揚武將軍五千
七百戶作五千戶又遷使持節鎮南缺與本傳前後叙次
互異耳兵卽古文兵字將官名矩人名蜜同密說文作宐
宐必聲美畢切安也今經傳通作密廣韻密美畢切爾雅
郭注靜也玉篇止也默也深也又宐也埤蒼宐宐也集韻
或作密宐說文神也兵媚切徐云宐之言閉宐不可宣也
廣雅勞也密也藏也史記孝文紀宐祝之官後漢書伏湛
傳湛卒賜宐器馮動傳賜東園宐器賻贈有加趙憲傳憲
子代物故賜宐器錢布鉞期傳贈以衛尉安成侯印綬祭

遵傳贈以將軍侯印綬建武元年復設諸侯王金璽綬綬
公侯金印紫綬又諸侯王列侯始封貴人公主薨皆令贈
印璽玉柙銀縷蜜印綬云者蓋祕藏之義也亡友偃師武
虛谷曾爲余言碑出土日甚完好上下丹字俱存以瓊裏
瘞蓋當時字未鏤竟而藏埋入土者攷其傳景元二年薨
四年魏平蜀次年改元咸熙次年晉受魏禪或倉卒有未
及竣工者歟昭文張子恂持此本以贈云碑爲土人藏匿
故拓本甚少茲已移入孔廟矣後人當何如護惜之耶